

2026-mut aningaasanut inatsisissatut siunnersuut (Aningaasaqarnermut Akileraartarnermullu Naalakkersuisoq)

Saqqummiussissut

Siullermeerinninneq

Manna Naalakkersuisut sinnerlugit 2026-mut Aningaasanut Inatsisissatut Siunnersuut saqqummiuppara.

Nunatta Karsiata aningaasaqarnera ilungersunartumik inissisimavoq. Isertitat appariartorput, aningaasartuutit qaffakkiartorput akiliisinnaassuserlu naammanngilaq. Aningaasanut inatsisissatut siunnersuut pissutsinik taakkunannga sillimmartaarpoq, Namminersorlutillu Oqartussat namminneq sinaakkutaanni oqimaaqatigiissitsinissamik siunertaqarluni.

Pisarnitsitut iliorsinnaajunnaarpugut. Taamaammat 2026-mut aningaasanut inatsisissatut siunnersuut pisariaqartumik siunnerfimmik allannguineruvoq. Naak pissutsit ilungersunaraluartut aningaasaqarnerup ukiuni tulluittuni sisamani oqimaaqatigiissinneqarsinnaanera siunnersuummi takutinneqarpoq. Naalakkersuisut siunnersuummik akisussaassusilimmik saqqummiipput, tassanilu aningaasartuutit isertitanut piviusorsiorpumik naatsorsuutigisinnaasatsinnut nalimmassarneqarput – tamannalu atugarissaarnermi suliassat pingaarnerit tunulliunnagit ingerlapparput.

2026-mut aningaasanut inatsisissatut siunnersuut isumatusaarnermik piviusorsiornermillu toqqammaveqarpoq. Siunnersuut nutaarsiassanik annertuunik aningaasalersorneqanngitsunik neriorsuutinilluunniit akisuunik ulikkaarlugu immerneqanngilaq. Piviusorsioruuvoq. Akisussaaffeqartuuvormi.

Aningaasaqarnikkut inissisimaneq

Nunatsinni aningaasaqarnikkut ineriartorneq sungiusimasatsinnit kigaanneruvoq. 2024-mi nioqqutissianik sullissinernillu pilersuinerit tamarmik nalingi 0,7 procentimik siuariarput, 2025-milu siuariarput sulii appasinnerusoq 0,4 procentiussasoq ilimagineqarpoq. Januar 2024-mit januar 2025-mut akit qaffariartornerisigut aningaasap nalingata appariartornera 3,6 procentimik qaffappoq. 2025-mi ukioq naallugu akit qaffariartornerisigut aningaasap nalingata appariartornera 2,8 procentimik qaffannissaa, 2026-milu 2,0 procentit missaannik qaffannissaa Aningaasaqarnermut Siunnersuisooqatigiit ilimagaat. Aamattaaq 2025-p ukiuata affaani siullermit suliffissaaleqisut amerleriarput.

Nunatta Karsiata aningaasat uninngasuutai appasippallaarput, ikiliartorlutillu. 2025-p naanerani aningaasat uninngasuutit 661 mio. kr.-upput, taakkulu ingerlatsinermut aningaasartuutit 8 procentiinik naleqarlutik. Ukiup naaneranut maanna missingiutaasoq 270

mio. kr.-t missaanniipput, taannalu ingerlatsinermut aningasartuutit 3 procentiinnaannik naleqarpoq. Taanna 10 procentimik nalinginnaasumik periusissatut kaammattuutigineqartumit appasinnerujussuuvoq.

Aningasaqarnikkut tamaviaarnartut aningaasaqarnermut politikimut sinaakkusiillutillu killiliipput. Soorlu akiliisinnaassutsip killeqarnera maanna aningaasaqarnermik appariarnermut iliuuseqarniarluni annertusaanissamik suliniutissiortitsisinnaangillat.

Tamaviaarnartut arlallit pisortat aningaasaqarneranik tatisipput. Innuttaasut katitigaanerisa ineriartornerata kingunerisaanik utoqqalinermi soraarnerussutisianut aningaasartuutit qaffakkiartorput. 2026-mit 2029-mut inuit 67-it sinnerlugit ukiullit amerliartornerat pissutigalugu 348 mio. kr.-nik aningaasartuuteqarnerunissaq ilimagineqarpoq. Namminersorlutik Oqartussat ingerlatseqatigiiffiutaannit isertitat siusinnerusukkut ilimagineqartunit aamma appasinnerujussuupput. 2026-mit 2029-mut ataatsimut iluanaarutisiat 320 mio. kr.-t missaanniinnissaat ilimagineqarpoq. Taakku siusinnerusukkut 780 mio. kr.-nik missingiusianit 460 mio. kr.-nik ikinnerupput. Nunalu tamakkerlugu akileraarummit isumalluutinillu iluaquteqarnermi akitsuutinit isertitat apparput. Siusinnerusukkut ilimagineqartunut sanilliullugu taakkunannga isertitassat 339 mio. kr.-t missaannik appariarput. Pissutsit taakku ukiunut siusinnerusunut sanilliullugu annertunerusumik aarlerinaatinik aqutsinissaq pisariaqalersippaat. Taamaalilluni Nunatta Karsiata oqimaaqatigiinnissaa qulakkeerneqassappat, aningaasaqarnikkut aqutsineq pingaarnersuiunerlu sukannernerusariaqarpoq.

Ukioq manna aningaasanut inatsisissatut siunnersuut ”*Oqimaaqatigiissitsiartorneq aamma piujuartitsinermut ikaarsarneq*”-mik qulequtaqarpoq. Innuttaasunut nammatasseeqqinnani aningaasaqarnikkut oqimaaqatigiissitsinissaq Naalakkersuisut anguniassavaat. Aningaasartuutit nutaat pingaarnersueqqinnikkut aningaasartuutaareersunilluunniit annikilliliinikkut taamaallaat aningaasalersorneqarsinnaapput. Innuttaasut akileraarutai qaffanneqassangillat nutaanillu akitsuusiiffigineqarnatik. Sipaarutaasariaqartut pisortat ingerlataanni, suliffeqarfiutaanni tapiissuteqarfignartagaanniluunniit nassaarineqassapput.

Aningaasanut inatsisissatut siunnersuummi ukiut sisamani oqimaaqatigiissitsinissaq angujumallugu, ileqqaarutit aalajangersimasut 864 mio. kr.-nik naleqartut inissinneqarput. Ileqqaarutit taakku suliniutit aalajangersimasumik marluusunik piviusunngortinneqarput. Ilaatigut Naalakkersuisut peqqinnissaqarfik ilaannakortumik ilanngunnagu ingerlatsinermut tapiissutinullu aningaasaliissutini akit aningaasarsiallu qaffariarnerannut aaqqiinngillat. Tamanna 469 mio. kr.-nik pissarsiffiuvoq. Tamatuma saniatigut aamma pisortani tamangajanni ileqqaarutinit 2,5 procentinik ileqqaarnerit ingerlanneqarput.

Taakku tunngavigalugit aningaasanut inatsisissatut siunnersuut ukiuni sisamani aningaasanut inatsisiliorfiusuni ingerlatsinermi, sanaartornermi taarsigassarsisitsisarnermilu 50 mio. kr.-nik annikitsunik sinneqartoorfiuvoq. Tamanna IST-mi inernertut taaneqartarpoq. Nunatta Karsiata taarsigassarsisitsinera isiginngikkaanni, IS-imi inermeq 10 mio. kr.-nik sinneqartoorfiuvoq. Sinneqartoorutit taakku Nunatta Karsiani naapertuuttumik aningaasanik uninngasuutinit pilersitseqqinnissamik pisariaqartitsineq eqqarsaatigalugu annikinnerpaatut isigisariaqarput.

Pingaarnersiunerit siunissamullu suliaqarnerit

Sipaarniartoqarualuartoq immikkoortuni qitiusuni pingaarnersiuisoqartariaqarpoq. Akit aningaasarsiallu ineriartornerisa ilai matussuserniarlugit peqqinnissaqarfimmut aningaasaliissutit nalimmassaavigineqarput. Kujataani Qaqortup mittarfiata 2026-mi ammarnissaata tungaanut inunnik assartuussinnermut aningaasaliissutit qaffanneqarput. Ilisimatusarnermut umiarsuarmut Tarajumut aalaakkaasumik ingerlannissaanut aningaasaliissutit ilaneqarput.

Partiit naalakkersuisoqatigiinnermut isumaqatigiissutaat naapertorlugu ungasissumut sammisumik attassisinnaaneq qulakkeerniarlugu soraarnerussutisiaqartitsisarnermik aaqqissuussinnermut aaqqissuusseqqinnissaq aallartinneqarpoq. Tamatuminnga suliaqarnissaq arlalinnik pingaarutilinnik siunnerfeqassaaq. Suleqatigiissitaq immikkut ilisimasalinnik inuttaligaq 2025-mi pilersinneqassaaq, soraarnerussutisiaqarnissamilu aaqqissuussamut aaqqissuusseqqinneq 2026-mi aallartissaaq.

Aaqqissuusseqqinnermik isumalioqatigiissitap pilersinneqarnissaanut aningaasaliisoqarnissaa Naalakkersuisut siunnersuutigaat, taakkulu 2025-mit 2026-mut pisortat ingerlatsiviannik pisariinnerusumik periarfissat misissoqqissaassavaat. 2027-mi isumalioqatigiissitap kaammattuutaanik atuutilersitsineq aningaasartuutikinnerulersitsillunilu pisariinnerusumik isumalluutunik atuilluarnernerumik kinguneqarnissaa ilimagineqarpoq.

Aningaasaanut inatsisissatut siunnersuusiorderup inernerata kingorna, danskit naalakkersuisui ukiuni sisamani 400 mio. kr.-nik nunatsinni suliniutinut immikkoortitsinissamik siunnersuuteqarput. Naalakkersuisut Siulittaasuat statsministerilu aningaasat taakku atorineqarnissaannut ikorfartuisumik sinaakkutitut isumaqatigiissut atsiorderpaat. Erseqqinnerusumik aningaasaliinissaq danskit naalakkersuisuisa Naalakkersuisullu akornanni isumaqatigiissutigineqassaaq. Aningaasat danskit aningasanut inatsisaata akuerineqareernerani, aningaasallu atugassanngortinnissaannut sukumiisumik isumaqatigiissuteqartoqareernerani aatsaat, Naalakkersuisut aningaasanut inatsisissatut siunnersuutaannut, ilanngunneqarsinnaanerata erseqqissaatigineqassaaq. Taamattaq Nunatta Karsiata ilaatigut umiarsualivinnik mittarfinnillu sinaakkutitut isumaqatigiissummi taaneqartunik pilersitsinnermut atatillugu arlaatigut ingerlatsinnermut aningaasartuuteqarnissaata pisariaqartinneqarumaarnera erseqqissaatigineqassaaq. Suliami nutaarsiassaqalerpat Naalakkersuisut Aningaasaqarnermut Akileraartarnermullu Ataatsimiititaliaq suliaq pillugu ilisimatissavaa.

Aningaasanut inatsisissatut siunnersuut Aningaasaqarnermut Akileraartarnermullu Ataatsimiititaliamut suliarineqartussanngorlugu innersuunneqarnissaa ilimagineqarpoq. Ataatsimiititaliaq siunnersuummik suliaqarluarnissaanik Naalakkersuisut kissaappaat, ataatsimiititaliallu apeqqutaasa akineqarnissaat qilanaaralugu.

Tamatuma saniatigut Naalakkersuisut partiinik tamanik aningaasanut inatsisissamik isumaqatiginninniarnert pisartut qilanaaraat. Tassunga atatillugu aningaasanut inatsisissatut siunnersuummi aningaasanik annertunerusunik atugassaartoqannginnera Naalakkersuisut

innersuussutigissavaat. Taamaammat aningasaartuutissanut nutaanut siunnersuutini, qanoq aningaasalersorneqarnissaannut isumaliuteqartoqartariaqarpoq.

Naalakkersuisut taama oqaaseqarlutik siunnersuut Inatsisartunut suliassanngortippaat.